

摘藻堂四庫全書薈要

集部

欽定四庫全書薈要

集部

皇清文頴卷四十五

詳校官候選知縣臣吳甸華



欽定四庫全書薈要卷一萬九千四百四十六

集部

皇清文頴卷四十五

賦

豐澤園賦

胡會恩

聖皇之受命浹至化於寰區履潤澤而大豐美兮皆
帝德之覃敷登羣生於熙皞兮躋盛治於黃虞惟茂對
之時勤兮匪苑囿之足娛歌薰風之解愠兮仰淑景之

常舒奉

宸遊於清暇兮扈臣工而樂胥值千載之榮遇兮幸叨
附於簪裾感

隆恩之莫殫兮詎翰墨之能攄繫西苑之為勝也浴太
液之晴波峙瀛臺之盛槩鮫宮日麗以淳泓龍壑雲蒸
而澎湃儼蓬閣之仙都兮遊泰清而餐沆瀣瞻佳氣於
層霄敢褰裳而夙戒夫何承

嘉命攬晨暉歡迎

翠輦肅候彤闈橐載詞臣之筆香凝侍史之衣洽深仁
於蠕動霑和氣於翺飛爾乃蘭舟乍引錦纜徐牽似涵
光於軒鏡總拜舞於

堯天玉饌傳頒飽飫大官之膳珍肴羅列寧惟蓬鱸之
鮮郢水仙醪光凝碧璣上林嘉菓芳郁瓊筵

渥典頻施

榮光載錫喜桂苑之初披值龍樓之曉闢則有文窻宵
窈畫檻玲瓏參差碧瓦燦爛珠宮垂清霄之竹露扇碧

治之荷風循玉砌而逶迤仙葩的爍度金溝而延竚嘉
樹龍葱若夫揚髻嘒藻盡文囿之遊魚拂羽含花疑瑤
池之神鳥漾錦浪兮浴烟汀立玉砂兮棲碧草凡茲麗
景皆競秀於

宸居每值芳辰盡爭奇於仙島既供四時之賞尤宜長
夏之天槐陰成幄榴火初然荷

皇情之悅豫愧臣職之多愆懷盛事於卷阿遊歌足誌
紀良遊於在鎬頌美堪傳况夫

聖慮勤農

天心貴穀植禾稼於平疇恍田功之在目詠離畢而神怡瞻雲漢而遐矚知

九重時切於民依而舉念不遺於蔀屋者也臣等才慙班馬學謝鄒枚授簡濡毫莫殫頌颺之悃瞻雲就日難言侍從之才徒知感

聖德之蒙帡沐

恩波於溟渤雖復竭微忱殫筆墨安能名穹壤之高深

而述

榮施於萬一耶

豐澤園賦

沈涵

猗

聖主之勤民兮維稼穡以作寶當

禁苑之奧區兮闢華園於靈沼
滙太液之滌迴兮注玉泉之灝
漾愛土物以臧心兮匪耳目之
競好既桑柘之成陰兮復蒔藝
夫香稻爾其溝塋四達阡陌中
分土膏應暖農祥戒晨提壺曉
喚布穀宵聞紺壇既祀東作方
殷施溉則荷鋤如雨播種則奮
鍤成雲既而楊柳拖黃

笑蕖清暑耘耔攸勤嘉禾膴膴蒸榴火而彌馨扇蒲風
其如舞耕歌同蠶繅以相聞穗葉映桑枝而並吐更靈
雨之灑灑貫百川而布濩湧丹壑之漉流潤碧霄之溼
露皆

睿心之默禱遂感通而大澍若乃涼風降白露霏木葉
脫百卉飛黃茂實丹顙肥萬寶告成原隰有輝覩公田
之嘉穀先衆壤而陸離於是雲黃滿目刈穫是始或歌
連穎之奇或詫兩岐之美撫環畝之幾何忽萬億其維

秭田畯入聞

天顏有喜匪幸此地之有秋實卜豐年之同軌然則是
園也以供染盛以薦明禋瞻終歲之幹止識民力之普
存故義取乎天澤之下逮而象徵夫豫大而豐亨豈若
甘泉華林僅耀遊觀之美玉津九成徒誇壯麗之榮而
已哉於是

天子憑黼宸排闥閭當萬幾之暇日撫百彙之繁昌集
垂紳之鷺序招珥筆之鴈行相與陪遊於縣圃之側而

授簡於水殿之旁重為詩曰巍巍

禁苑兮渺渺蓬瀛匪教匪紓兮黍稷維馨農夫之慶兮
我

后之誠於萬斯年兮大有書呈

豐澤園賦

陸 棻

豐由德兆澤以心敷時雖清燕念切民瘼當恢台之長
夏處高明以非娛聆時鳥之好音觀百卉之向牕鳴流
泉于澗曲緣石磴于周塗爰滌修壟藝嘉禾勤桔槔課
耘耨綠苗芊芊油油以舒潤之以膏雨舞之以陽烏
天子乃駕丹轂駐靈囿光風扇和慶雲護晝天淵一色
瞻彼南畝進儒臣而賦之將以歌豐年而占大有也聞
在昔之典禮紘耜田以孔阜祈穀止于元日事三推而

釋手即省耕于郊圻亦交錯乎林藪何若覩胼胝于晨
夕驗長養于在宥閱田畯以志喜勝躬稼而維耦緬惟
斯園之創始在

瀛臺之坎隅象天一以生水為植物之所需柳織絲以
覆幕竹凝碧以環渠却遐陬之珍異禁網取乎珊瑚允
栽培之咸若昭儉德以旁孚固不啻書無逸于廡壁繪
豳風之古圖然而廣廈在前左經右史曲房周通疏廊
徙倚驚銀漢之遙溯儼蓬壺之覲止既飽瓊漿載斟香

醴飫苾芬以孔時歌

令德之壽豈比在渚之鳬鷺樂依蒲而萃尾於是授素
繭發隄縻欲抽毫而鬱塞將殫思以縈紆竒木之對未
析連理之詞罕腴惟有望良疇以軒舞披渠藻而怡愉
敢不詠稔黍以祝和豐沛

聖澤於寰區將與諸臣溯田功于姬籙而頌府修于禹
謨

豐澤園賦

張廷瓚

惟

紫禁之鼎建抗燕山而啟都羅周廬之千列設寮垣之
百區隔瀟湘之縹緲拱環衛於

宸居開薇垣之勝地聊廣覽而遠舒乃有禁籞西偏華
林右掖路盤曲而紆迴樹叢密而翳鬱日月吐納雲烟
羃歷平楚流青修柯聳碧徑以幽而若遠地以靜而如
僻類

豐澤之嘉名實園林之安宅爾其前瞻太液遙望廣淵
貫注蘭沼發源玉泉匯羣流之浩蕩疊萬頃之蒼烟眺
波光之澄徹儼冰鏡之初圓是蓋

天子重無逸而念民依憫艱難而崇儉德觀稼有懷農
莊斯設秋雲亭畔則華黍飄香嘉穎軒南則翠痕如滴
雞聲隱叢竹之籬犢路入柔桑之宅羅襪襖於上林雜
腰鎌於華闕隱白屋於朱扉繁青禾於紫陌一犁春水
連朝添時雨之波十畝秧針徧地散晴嵐之碧此所以

蔀屋之辛勤經四時而遍歷惟

睿覽之咸周非九重之能隔者也至於佳卉分叢芳草
成簇同心之花連理之木或倚石而紛披或拂檻而堪
掬瓊枝與碧樹相依紫萼與朱芭並屬芝塲蕙圃之青
蔥葵徑蘭階之馨馥長風度而五色俱飛微雨過而百
花都沐移來鳳竹當長夏以生寒發茁龍孫吹筠香而
凝綠篴簞千畝何殊渭水之濱琳瑯萬竿不數淇泉之
曲此又麗景之怡情而芳菲之觸目者也至於逶迤百

柱宛轉層楹琢文石以延路架素椽以成亭櫺檻留太
撲之致棟宇無金碧之形

聖德惟儉天道同清豈非百代之矩矱萬世之法程哉
我

皇上萬幾在御宵旰深宮當蕤賓之協律值炎景之方
中御迎涼之殿閣臨清沚之簾櫳沛湛恩之汪濊訓珥
筆之臣工念長橋而路曲許乘舟而御風頒天厨之尚
膳賜旨酒於花叢感自天而沛澤慚無地以措躬瞻紫

霄之佳景愧薄藝之雕蟲願藜燃以奮志亦葵向而抒
忠

豐澤園賦

彭寧求

美上林之鉅麗啟禁苑之芳菲惟

皇心之勤恤念稼穡為民依因陂池之瀦蓄倣隴畝之
町畦每省耕於東作亦觀穫於秋期儼江鄉兮在望施
普惠兮及時軼樂成之舊宇為

豐澤之新規爾其

秘閣宏開曲廊迴互玉碣朱甍疏窻洞戶既啟鑰於重
門或移形於跬步借尺水以興瀾壘小山而起霧循除

泐泐泉鳴階下之流繞砌娟娟竹蔭墻隅之路花含笑
而迎人草成茵而浥露移瑯菜於仙家植綺蔥於瑤圃
魚遊沫於清池鳥弄簧於芳樹洵景物之恬熙娛澄暉
於朝暮平疇環列荷鍾成羣春和始布淑氣方勻紺轅
將駕黛耜畢陳建青旗以

涖止如出舍以觀民泊乎田塍秧茁陌上風薰人皆力
作苗亦懷新睹烟簑於清曉聽牧笛於斜曛有滄萋萋
雨灑亭臯之潤出日杲杲晴看隴畔之耘若夫時屆西

成奄觀刈獲被野兮雲黃迎寒兮霜落輸歲入於倉箱
樂遺種於烏雀即苑內之多收占民間之豐樂蓋自玉
泉之水太液之池滙為廣澤散作文漪泓碧千頃鱗沆
四垂可以資灌溉可以備耕犁因山川自有之利相神
阜物土之宜故草木紛敷百卉盡觀其榮茂土膏脈發
九穀尤快其華滋我

皇儉德圖維永賴居逸思勞席豐戒泰木不雕鏤室無
藻繪雖身處乎

法宮常神周乎郊外以此知昔人之弄田鉤盾者猶未勤而我

皇之親耜耒絃者意未艾也彼夫華林勝矣而非實政之修玉津麗矣而非民事之謀豈若茲園

惠澤滂流狹制度於文囿傳休聲於夏謳丹水紫淵無勞乎厲禁蘭塘蕙圃不假乎收采願荷彤墀之橐長承清蹕之遊

豐澤園賦

史夔

我

皇上御極之三十有三年閭澤覃敷恩波汪濊瑞露如
珠卿雲似蓋風和解慍之琴光湛常盈之會固已雨暘
咸若百室慶其盈寧寒暑調均萬國欣其履泰而猶無
逸時陳豳風屢繪周知稼穡之艱難歷覽閭閻之穰
旆修堤防而四海無波除螟螣而三時不害蓋其所
旰食而宵衣無非念蒼赤而籌猷澮也若夫城連上苑
路入

平坡月泛瀛洲之島雲迴太液之波參差水蓼掩映風
荷喜嘉生之得地紛芳卉其何多維時節屆朱炎時逢
夏閏日躔當至後之辰星次屬中官之正榴花已綻復
吐丹葩蓂葉全稀還舒翠鬢人歡夏景之長

天錫太平之慶

聖天子於是嘉茂對鼓南薰樂年和而歲稔時稽古而
右文爰

命儒臣各懷鉛槧仰窺

天宇之崇飽食大官之饌俄聽傳呼

賜之遊覽載瞻

豐澤之泉林極目和風之荏苒爾其平沙似毯細草成
茵攀柔桑之鬱鬱蔭田畝之昀昀望黃雲之藹藹俯綠
水之鱗鱗散漫盈疇彷彿春江之景龍蔥散野依稀蓬
島之濱瑞稼搖風若吐黃金之色纖芸擢露宜因黑壤
之淳豈獨十畝千鍾上林早得陽和之氣已知兩岐一
穗萬載長霑雨露之仁臣學媿雕蟲才非夢鳥叨陪侍

從常賡復旦之光華清切

黼宸時覩紅雲之縹緲而乃恍疑仙境忽到天邊嵩呼
以拜魚貫而前猥措躬之無地荷授簡之自

天銀管分題未得罄揄揚於萬一嘉禾獻賦願常歌多
稼於大田謹拜手稽首而為之頌曰玉燭調兮萬彙昌
黍稌多兮呈嘉祥惠風扇兮甘露灑苔頴紛披兮實倉
箱薦之

祖廟兮郁馨香

聖壽無疆兮瑞穰穰

豐澤園賦 有序

沈廷文

園在大內之右西苑之中巨構宏開規撫太素程
材庇宇就下因高木不雕鏤飾無藻績雖茅茨儉
樸不資人力之勞而山水縈環未減天工之勝我
皇上萬幾清暇翠輦時臨聽政勤民於是乎在泛舟仙
沼弭節靈臺拂雲罕之禁離皆成湛露振芳蕤之
的皪盡是天葩爰咨翰墨之臣用紀林臯之美夫
探奇策府非無羣玉之峯選勝名區亦有三神之

境虛傳美麗無裨高深豈若今茲有逾曩烈用竭
管蠡之見敬陳頌述之情自愧蕪詞無當勝槩

皇清之握象闡珍錫圖凝厯包六合以為家總八紘而
作極貞符曜明泰階寧謐既天室之攸芋亦名園之是
即位臨西兌而義取屢豐地接東瀛而聲宏大澤蓋自
玉泉之水太液之池滙為巨浸散作文漪泓碧千頃蒼
莽四垂日月吐納巖崖蔽虧雕梁界道錦甃交門鳳標
翥羽鯨石翔鱗控玉竦以噴雨跨金鰲而嘯雲霞波如

綺嶺吹無塵景山之巖岫巖從瓊華之洞壑玲瓏磴道

窈折澗戶幽通屏嶂羅列環玦琤琮峰迎仙仗谷應曉

鐘欲霽而林暉千狀其雨則嵐霏萬重乃有丹梯盤互

曲廊懸度隰衍原平隄迴川注激水鳴春藏舟紆浦葆

翠桑濃麥黃雲聚層臺之輝近日芊琳碧以為粧紺宇

之馥迎風散氤氲而成霧于是林巒迤麗川陸縱橫纓

岡帶阜繚白縈青樓觀峯萃殿閣崢嶸璇題壁礪繡拱

雕甍苔苔迥出翼翼孤擎跂飛鳥以斯厲佩長虹而若

縈軼雲雨以下度排星河而上征可以仰餐顥氣俯揖
羣靈重以新萸璀璨芳卉紛蕤芝房三秀蘭畹九滋梧
則葦萋生岡竹則檀欒映池桃李則不言成蔭松栢則
後凋挺姿般般之足翾翾之儀輟馭白澤囿擾黃支鳧
雁翱翔于修渚孔翠翻飛于茂枝既乃品彙恬熙景物
明淑睇萬里于纖毫攬九州而盈掬紫塞斜縈紅螺森
矗聚燕風恬掠鶯霜肅隱現桑乾之河縹緲香山之麓
金臺有駿骨之羣泰時見神光之燭升高望遠四維一

矚栢梁無以絜其觀靈囿於焉方其躅若乃麗旭始升
惠風初扇時鳥嚶鳴繁英蔥蒨黛耜正陳紺轅將勸辨
雲物于佳辰播雨膏于芳甸暮春合射之儀元已流觴
之宴殿中揚白獸之樽水面捧金人之劍又若南詔應
律祝融司天清暉擁榭翠漲平川龍髻齊奮鳳珠爭騫
凌雕文之畫舸曳湘縠于輕烟荷碧簫以猗靡榴絳實
以鮮妍葵叢生而就日蒲九節而延年逮夫清商乍奏
爽宇乃澄柳寒月皎桐疎露清挹仙莖之沆瀣聽天籟

之筭筌省斂則玉田杭熟招飲則小山桂馨暨乎重陰
應候役車既休天同雲而一色水凝冰而不流瑤玉盈
枝比剪綵而較逸瓊華堆砌笑埒地其奚求豈止歌黃
竹而恤祁寒之困咏來思而軫遠戍之愁是以端居九
五游神八荒靡遠弗届何施不臧覽動植之機以廣仁
慈之汜護悟流峙之理以侔道德之精剛既書同而軌
一乃化美而治光罷烽堠于寰海受共球之駿龐攄卿
雲而復旦呈含譽以垂芒遂乃彌性游翱從容詠陶學

山探奧藝海迴濤緝熙懋建俊入勤招履高思下居逸
念勞岐陽鼓鐘之盛卷阿車馬之饒陟斯園以同樂抗
往哲而為昭小臣作頌用補風謠頌曰天垂辰象地敞
皇州撫茲勝境夏乎建游餐華日近吸英霞浮匪風則
御亦雲與遊同規方丈比美瀛洲六龍蒞止視遠聽周
聖心孔懌庶政載修惟德峻極上與天侔百常允陟景
福來酬瑞繁山委嘏集川流潤澤豐美萬禩千秋

豐澤園賦

劉 灝

維金墉之西隅納清流之四會激湍縈乎其中喬木蔭
乎其外鬱積翠之沉沉覆輕雲之藹藹地遠應夫方壺
象高侔夫圓蓋相彼名壤豫我王心映山為圃削木成
林庭移嘉卉苑育珍禽揮七華之扇撫五絃之琴感南
薰以奏曲迎北戶而披襟迺其華不為奢儉不至陋桂
柱芝栢瓊臺玉甃飛梁夭矯而相扶拱棗聳翼而匪鏤
開芙蓉于別殿冒翠愚於中雷峙亭榭于上下環池沼

于左右夸秋水之橫汾眇岐陽之靈囿我

皇上居深穆思稼穡念茅屋之艱難重田功之生殖擇
隙地之縱橫培嘉種以黍稷爰分隴畦旋疎溝洫度南
東而成畝依保介以為式望阡陌之渺瀰睇稻梁之岐
疑於是或耘或耔時雨時風風搖麥浪雨洗禾叢與宮
花而掩映迎旭日而瞳矐秉錢鏹而是利擬襁褓而能
工則有鳩呼碧樹雉翳蒼烟來從遠澤棲近平川繞柳
邊之畫鷁匝塘外之新蓮載飛載鳴看鷁鵲與鷁鷁以

游以泳雜魴鯉與鮪鱣莫不依青叢之藝藝樂碧葉之
田田我

皇上攬茲休嘉遊當餘暇茂順歲時潛調元化察燥濕
于高卑驗寒燠于春夏覩決渠之潺湲快垂實之穰稌
親嘗玉粒之香如履茅絢之舍既農事之周知復

恩綸之屢下於是精誠上格大有頻書奏五色之雲物
通九州之河渠秀一莖之九穗錯舊畝與新畬見崇墉
之倉庾成比櫛之田廬皆曰

天心之愛悉由

帝力之餘是知

九重匪遠七月時歌暢

宸遊于別館暢治道于卷阿懷閭閻于寤寐想情狀于
笠簑

沛豐澤于下土偕雨露而滂沱於是人人歡于草野歲
歲沃于

恩波相與仰

君心之無逸頌

皇居之有那

欽定四庫全書

卷四十五

嘉穀賦有序

彭寧求

皇上運當清宴治奏歌功勤恤民依疇咨政理大沛蠲
施之惠兼籌積貯之方厚澤深仁淪肌浹髓

至誠孚格嘉穀兆祥濯玉露以芄芄含金風而栗栗地
當燕北是陽回吹律之區節屆秋成方令肅涼颼
之候潔齋用薦卽供

御廩之藏燔燎升馨何啻玉山之種洵瓌奇之非寶惟
土物之宜珍羣臣諦觀並深雀躍夫蓮開合拊往

冊猶紀禎符瓜實駢根昔人尚垂歌頌况茲休瑞
著兆豐年樂民事之順成卜

天心之純佑臣雖愚昧私竊懼欣敢竭疎庸敬陳斯賦
賦曰

昭昭璇極眷我

聖皇誕降嘉種寰宇悅康觀靈苗之滋阜知卒歲之豐
穰瓊粒方苞叶瑞應於黃耆黑秬籌車是載樂歲輸於
高廩神倉由

帝心之求莫能昭格於

穹蒼繫昔盛王高蹈遐軌不以金車銀甕為珍惟以時
和歲豐為美所以書述歸禾詩編華黍同穎表于周年
六穗書於漢史或以兩岐連秀興謠或以一稻再實著
紀降休於荏菽禾麻辨種於秬秠糜芑凡以明年穀之
豐登遂羣生之幹止豈比粒自瓊山未來北里鄙上之
黍稱奇不周之粟示侈惟

天鑒

聖布德施仁蠲租發帑給廩賑貧動盈千而累億務家
賜而戶均厯艱難於宵旰籌預備於倉困湛恩汪濊閭
澤霡淪綈几

九重圖繪尚陳乙夜朱紘一揆祈年首重三春積誠感
召爰鑒精禋屬三農兮望澤流協氣兮氤氲沛雨膏兮
滲漉發土脈兮埴埴猶復

勤思九扈周爰諮詢建

翠華以出狩度榆關而北巡擁六飛而騰躍環七萃之

鈎陳雖弊禽而表貉兼省歛以觀民方夫紅旗
駐輦黃茂如雲睹瑞穀兮滋植喜禾黍兮鋪荼

皇情顧而悅豫宣嘉慶於臣鄰爾其翹穎揚芬纖芒吐
秀含實蕃滋擢莖豐茂浥露搖風交綺錯綉其拔地而
出也森矗無尋其並壟而生也分歧煩富歲蕤薺離兮
如結綬與流蘓璀璨錯落兮若連珠與列宿覺一稂二
實之非奇驚一莖九穗之重邁彼夫厨生舜篲階秀堯
蓂花開紫脫木號華平朱草豐於中唐神芝產夫九莖

競呈祥而獻瑞稱盛世之休徵然而無裨日用罕濟民
生豈如茲穀預兆豐亨千倉萬箱兮普作農夫之慶壙
崇櫛比兮詎惟

天庾之盈垂休光於史冊昭明德之維馨百爾羣工聚
觀樂豫卓矣貞符淵乎

睿慮惟稼穡之為寶惟田功之是預德產之致精微明
昭之賜顯著爰歌大有樂康年吹豳雅賽秋田共含哺
於

聖世同擊壤於光天末臣欣逢乎上瑞願載賡夫多稔
多黍之篇

玉河春柳賦

彭寧求

伊鳳城之繁麗何草樹之紛披挺靈芝於玉殿敷瑞莢
於瑤池苑內則星榆掩映宮中則月桂參差嶰竹植上
林之園嶽蓮開太液之池維茲玉河滌汨城畔派衍珠
淵光搖銀漢波紋感兮如羅水面平分若綵爰有垂柳
千株扶疎兩岸本大角之靈根實真陵之嘉幹爾其灰
飛鳳琯氣轉鴻鈞覩光風之啟序知遲日之臨春寒冰
折玉芳草舒茵喜靈和之遺種獨倚候而精神依依猶

舊濯濯如新乍抽芽而鮮碧旋布葉而繽紛暮輕烟兮
漠漠疊淺浪兮鱗鱗遂迺颺晴絲凝翠靄秀色堪餐清
陰可愛細裁金剪之雲濃染香奩之黛碧看螺子無殊
黃與鶯雛相配一顰一笑疑拈覽鏡之毫三起三眠頓
減舊圍之帶穿燕縷而無踪調鶯簧而斯在玉虹隄外
金水橋邊傍紫城而婀娜俯碧澗而蹁躚籠輕條於沙
岸垂密蔭於平川影亂春莎之髮光飛紫葍之錢浴鳥
乘陰而顧慕游魚避日而盤旋態悠揚兮月下姿綽約

今風前襯明霞而增媚沐細雨而加妍低拂維舟之纜
斜縈走馬之鞭對王恭於此日想張緒於當年於是
翠輦高臨天街遐矚駐鳳蓋於蘭塘引霓旌於綺谷賞
斯柳之乘時抱清芬於水曲瞻日月之光華攬山川之
秀淑身久沐夫恩膏材豈同於樸遼枝枝盡繞於紫宸
葉葉還飛於丹屋依矐矐之

北闕萬縷黃金對晡靄之西山千條碧玉豈若章臺落
絮灞岸飛花朝朝繫馬夜夜藏鴉移在營前僅號將軍

之府種於宅畔或傳處士之家所能同其勝槩比此風
華也哉乃為歌曰旖旎玉河側垂楊踈地新清光映荷
芰亮節比松筠共知雨露天邊近密葉疎條總是春

天行健賦

史夔

兩儀奠極高卑以陳乾元資始得一以清立崑崙之華
表合太乙之陽精羅萬象以成化涵九野而無形蒼蒼
者色之正湛湛者鑑之明中秉樞而莫測外轉象而常
盈此則於穆者天之命而默運者天之行也若夫連珠
合璧二九相配絡黃赤之九道紛總總其交會列宿碁
布而成章三垣因之以定位自鴻蒙之始判轉機緘於
圓蓋閱銅史之游更物混成而無外應節宣威隨時解

沛莫不統綱維於泰元鼓鴻鈞於一氣此則天行之旋
轉於胚渾而包括乎元會運世者也粵稽上古欽若昊
天堯曰廣運舜惟至誠在璣衡而齊七政鼓南薰而阜
八埏君子體之以自強不息聖人則之以辨義行權欽
惟

皇上秉粹精之德符易簡之能道春生而夏長運日升
而月恒居紫微之宮則翼翼穆穆藹藹融融鈞陳肅整
以環衛經緯參差而翼從燭方隅之幽隱總萬幾於清

衷故能朗杓魁而消氛侵舒

乾斷而協化工渙

皇居發大號祇神人極丕冒赫濯兮聲靈霆馳兮電掃
德容睟然旁搜典誥揮

宸翰則翔鳳隨戈攄

睿章則流珠入奧露雷風雨施膏澤以無偏雲漢星辰
燦昭回而有曜爾迺時勤巡省咨訪郊墟幕黃雲之屋
乘雕玉之輿應龍受轡招搖翼輶朱鳥執節而前導雲

罕從風而颺旂羽林河鼓象台垣而拱立二十八宿趨
執事而周流信

帝德之法天納含靈于在宥垓埏莫麗無煩八柱之承
寒暑調均悉協四時之候寸陰不廢晷按度以常貞函
蓋靡涯澤應期而下究聚五星於奎曜文明之化丕昭
占六符于泰階至治之祥悉奏是故推厯象測躔垣以
三百六十五度者為天運之常而以與天同運萬福攸
同者為吾

皇之壽



允猶翕河賦有序

周金然

皇上御極二十有八載四海乂安兆姓樂業東漸西被
聲教訖乎九圍武緯文經典章邁夫百辟青雲浮
洛祥徵翠嫵之川榮光塞河瑞應黃圖之籙來朝
宗于萬國銘如帶于千秋大澤覃敷湛恩汪濊迺
者洪流既已奠定善後猶厯疇咨輓運千艘動關
軍國大計委輸一線端資疏濬良籌集廷議之紛
紜仰煩

宸斷重土功之荒度俯允躬親爰用諏吉南巡遂以首

春夙

駕所過無供億之擾引領望

翠華之臨瞻近日之方中歸市弗止欣時雨之來降扶
杖往觀進主伯亞旅以言情舉士農工商而胥慶
填衢溢巷喧傳

帝德無私忭舞歡迎快覩

天顏有喜由三輔而經千乘歷兩制而返三吳健若天

行迅如電發周知閭閻之疾苦昭宣吏治之激揚
誰為請貸祈蠲

特施弘赦豈由繪圖寫狀立沛

殊恩是宜地効其靈因茲人呈厥瑞重農屢勸

溫綸藹春雨之郊大賚頻頒戍卒挾陽和之續猶慮民
風之麥汰每殷

天語之丁寧爾迺

駐驛中河觀瀾高堰潤澤逾乎九里臨淵勗彼羣工凡

宜先事而隄防務法前規而修治授之方畧春流
穩泛桃花俾乃專司繡甸平添麥浪三呼填道千
峰餘嵩祝之聲五老呈圖半夜溢銀潢之彩此實
時巡之盛典曠代之隆規也微臣幸際昌時備員
史職欲紀河清之頌敬陳哀對之章寡陋為虞賡
颺莫罄謹再拜稽首而作賦曰

屠維荒落獻歲發春撫條風之應律值青帝之司辰回
斗杓於端月調玉燭於元正左个則三陽協氣東郊則

萬彙芸生

天子乃進三公咨九卿究吏治稽民情考閭閻之休戚
權政務之重輕念東南之財賦輸寶粒於神京緬淮黃
之峻流實轉漕之攸經灑沉之績既遠開塞之智奚憑
辨疏障之當否宜接地而審形

俞僉同之上請用荒度以躬親諏首春之吉期御雕玉
而南巡爰布

恩綸下

明詔史臣載筆而紀事虎旅橐糧而侍橐扉屢咸屏井
邑無擾斥供億於侯牧慮繹騷夫父老鉤陳夾衛以肅
穆風伯先驅而迅掃萬騎殷鑠百靈扶導前朱雀而上
招搖侍羽林而翼嫖姚天晶霧輕日暖霞蒸草霏霏而
承翠蓋雲澹澹而拂霓旌緹帷綉棧三屬重英出鳳城
而言邁遵芳甸以遄征整車徒以次舍張貂帶以如城
厯三輔之黃圖踐二東之青社過平原而釃酒面厯山
而駐馬挹瓊原之波濤倚泉亭而心寫署擘窠之偉觀

運銀鉤于腕下寄深旨于作霖即瀏覽而通造化憑嵯峨之雉堞閱海邦之廣野溟島則萬家蜃蛤沂兗則千里桑柘沛

德音于俄頃供正賦其蠲罷

天語布羣心娛黃童白叟接畛充衢提筐擁轡夾馬扶藜魯人進頌齊人獻謳騰祉氣於日出播和風于海隅岱嶽具敷徂徠龜鳧蜿蜒聯屬千嶺嵩呼我

皇乃御六飛揚鳳旗耳沿堤之頌聲踰汶泗而抵淮淝

曠澤國之滌渺瀉河流而灌輸帖稽天之巨浸拯萬族
于為魚既成效之足恃有勞績之可圖築金堤而捍淫
潦疏水門而導黃淤聯巨版以截業洶鐵城之不如順
時令以蓄洩又奚患于沮洳輟瓠子而弗歌簸桃浪其
無虞快澄瀾之東注庶旰食其永紓遂下廣陵度邗水
顧蕪城之壯傑覲蜀岡之迤邐聽竹西之歌吹戒肆鄺
之綺靡出瓜步以騁望馭風檣于楊子渺長江之天塹
界南紀之山川吞漢流之九派遡番禺之遙源捲浪而

鮫宮震盪鼓濤而地軸迴旋繫雙龍之夾檝淩蛟鏡而
洄沿昔淞西之疆理畫南徐而界焉總標名為吳會惟
繡壤之參連延陵季札之區惠井閭閻之地泛龍舸而
經過矚姑蘇之秀麗虹橋虎丘鷄陂鶴市十里五里笙
歌鼎沸遵往歲之寶訓既敦素之可嗣軫

宸慮之綢繆更殷勤而飭誨循滬瀆而左顧溯錢江而
汔濟鎮吳山而帶淞河邇南國之都會偃六橋于湖滸
展嫩荷于水裔非省方之所關固瑣屑而不足計維禹

蹟之所紀輯侯瑞于會稽開秘圖于石室呈如月之碧
珪受正符于帝命得隨刊之寶書用謁陵而展拜奠三
禮而薦犧美平成之偉績揭嘉號于崇祠升泰望而觀
海遂回舟乎剡溪計

巡幸之為期曾未淹乎匝月何美政之咸備書事言其
盈冊誦煌煌之

恩綍盡執香而感泣江左粳稻之鄉東吳財賦之窟荷
皇仁之浩蕩並捐除而已責家餘三黼之資門無一吏

之跡清畎泠風杏花菖葉穀我士女介我黍稷恐餘糲
之導奢

勅謹惜夫物力春社雞豚高年肉帛食以時而用以禮
慎蓋藏而勉節嗇期革薄而還醇勿波靡於積雪迺

簡廉能之長吏拊循之重責宥守令之小青俾久任
以勤職凡盡力以首公咸軫勞而加秩彼愚氓之無知
或自罹于罪辟令湯網之宏開罄棘林而蕩滌僉樂育
于春風似庶草之甲坼啟文明之景運首儲需夫人材

懼士林之雋彥或沉汨于蒿萊况吳越之菁英騰文光
于壁奎繫四方之趨向為風會之所開擴上庠之取數
冀無失乎龍媒家詠菁莪人歌芹藻園橋門而觀聽求
嚴師而問道儒冠昭耀于吳會子衿烏奕于江表雲霄
之路可梯淪棄之士絕少他若敏關之估舶持檝之役
夫執爰之禁旅荷戟之公徒或被

鴻慈而錫賚或俾迅發于中途罔令一夫之不獲奚啻
五日之賜酺用是謳吟滿郭忭舞載途迎馬首以就日

結綯綵以充閭雖屢禁而弗絕光霽煜于通衢觀雲旂
而喜溢望黼帳而爭趨握鉛者獻頌負耒者挈壺忘草
野之卑賤希攀留夫

玉輿

天子費百姓之煩費但慰之而未俞至如熊軾諸侯龍
驤上將分茅剖符勞來休養能輯兵以安民洵治世之
攸尚

賜駝羹與桐酒羣拜舞于

仙仗省方禮畢整轡遄回覽勝浮玉之岑倚檻妙高之
臺集水犀于中流肅鉤拒之規模赤羽若日練甲如荼樓
船焜燿旌幟紛敷役海童為水手命淵客而首塗晃金
支與翠旗接媯渚之正圖轉帆石頭觀風建業虎踞龍
蟠形勢天設陋典午之清談想明祖之餘烈禮寢園而
親奠獻謹守視而禁樵伐澤及故國之丘墟尤頌

聖仁之超越放船於燕子磯頭懷古于雞籠山側捐閒
架之舊征免蘆洲之稅額信恬波而捩舵矗高檣於直

北載經淮浦重憇楚州喜高堰之完固欣洪澤之伏流
亮懷襄之永奠攄善後之皇猷絡堤塘與港澗森碁置
而星稠彼鹽潮之焦稼亦滋潤於下游化渚田為沃壤
行漿乞而酒酬正河宗之獻斗溢榮光而上浮貢東海
之蒼烏漾星槎於遠洲然後道魚臺涉通濟揚錦浪而
送雲帆望

神京而返旌旆彼中途之頌禱暨阡陌之簞食自江國
而達

都門沿接蓋數千餘里於是乎照臨之下享甲之微沐
恩波之汪濊咸欣欣而自私幸曠典之時舉母五載以
遷期相與志慶曰樂哉乎斯世信遊栗陸而遇軒義幸
被

雲日之輝光安猷畝之恒業含哺鼓腹而歌呼耕田鑿
井而飲食抑浮侈而還太素謹嗜好而遵

訓飭舍偽趨誠敦本崇實廉恥之道興貪競之源塞闢
外戶而不閉封比屋而無擇上華封之祝詞樂舒長之

化日惟曰至于萬年宜子孫兮千億小臣簪筆而載颺
鏤盛美其何極



皇清文頴卷四十五



總校官庶吉士臣張能照

校對官檢討臣王鍾健

謄錄監生臣蔣予林

欽定四庫全書薈要

集部

皇清文頴卷四十六

詳校官候選知縣臣吳甸華



欽定四庫全書薈要卷一萬九千四百四十七

集部

皇清文頴卷四十六

賦

豐澤園脩竹賦

陳元龍

脩竹幸託青穹根盤閬苑葉覆琳宮風烟獨厚雨露偏濃影搖金而掩冉聲戛玉而玲瓏爾其裊裊紫筠娟娟青綺矗立涼館之前森標崇臺之際或蔭林臯或臨水溪一抹淡烟萬竿新霽扇輕颼以流暢含明月以

秀峙節亭亭而霄上陰靄靄而雲翳翠色紛披幽叢深
窈笋破紫苔籜辭綠篠橫斜漾靈沼之游儵羅列隱周
原之香稻青陽至而暈碧朱炎升而凝縹經素商而勁
質彌堅凜玄冥而霜姿含峭洵體元以儀天亦虛中而
象道故夫易著蒼筤書稱職貢衛風詠於淇澳楚材美
夫雲夢渭川則千畝翠連梁園則數林黛重投葛水以
化龍栽丹山而巢鳳長笛寫嶰谷之音炙簡有汗青之
用別有緣崇嶺婉長松循原隰竦層峯圍綉闥晃簾櫳

呈蔥蒨結蓊茸莫不參差掩映搖曳琤琮然未若茲竹
之悶景清都抗迹天中香吹細細氣鬱蔥蔥映青蘋與
綠萸雜淺紺於微紅潤滋密徑之莎響吟曲檻之風當
此休辰麗景衆芳芬馥砌草若茵井桐如沐上下熙恬
羣生樂育惟我

聖皇乘乾御六澤覃八紘仁敷九服普堯日於蒼黎嘯
舜風於林麓而茲園也雲軒旁睇月殿遙臨松棟不飾
茅茨兩層非考室於輪奐實示儉於蓬瀛隱輶則奧區

篠蕩曠望則廣衍溝塍桑麻繡錯疆場綺分夏至而嘉
禾垂穎秋登而玉粒告成清渠渺渺以皤穀水田漠漠
以鋪芬是乃

天家農圃神臯種稌文囿之所極觀豳風之所頌祝美
托根之得地斯企心於茲竹想其檀欒滴翠陸海搖寒
拂金楹以振響和珠泉以鳴湍動豫遊於雕輦邀

宸幸於彤軒涼生硤礧色間旌旄蕭森珍館映帶瑤壇
漾水紋而澄練襯霞片而飛丹韻悠揚兮寶瑟光皎潔

分琅玕挂枝而難尋公鳳戢羽而莫辨祥鸞美哉斯竹
實維嘉植擢秀瓊宇之旁布濩仙垣之側歷氷霰而莫
改不扶持而自直盖有取乎堅貞之性匪徒尚其青蒼
之色以是知陂池泉石之開苑囿園林之設乃

聖主所以務本宣風淳樸厚澤寧樂太素無煩雕飾每
寓意於栽培亦寄情於阡陌惟是民依之不忘終俾農
用之滋植故夫人知所本士知所勵薰陶於太和之中
樂利於時雍之世此見聖人育物之心茂對之意小臣

幸際昌期欣茲榮遇休寵曲錫沛澤下暨飽飫嘉羞沾
濡芳醴得賜矚乎清英乃睟昭乎

禁籞敢繼蕪詞於清風以揚至德於萬禩

經筵賦

宋大業

皇上體備生知聖由天縱
婉軒皇之敦敏邁岐后之誕
登勤政誠民親賢好學千聖百王之統悉滙於心
傳五經六藝之文咸通於神解
牙籤夜擁窮甲乙而忘疲
彤幄晨開歷春秋而靡間歲
當作噩月在夾鐘爰啟

經筵特陳講義闡中和之性理
探河洛之微言罔不敷揚
用資啓沃雖蘊函高厚非蠡管之能窺而運際

文明實頌揚之莫罄

微臣

幸列仙班觀

天顏之有喜欣逢聖典仰

帝德之日新敬獻賦曰

猗

聖王之受命接道統於義軒發珍符而秘啟寃寶策而
苞宣紹唐虞之曩烈扶周孔之遺編道下濟而交泰德
健行而協乾殫就將於夙夜勤學問於

經筵於時麗景垂天青陽應律獻節初開仲春始吉命

宗伯以諏儀咨靈臺而撰日立銅史以司聲候玉繩而
辨色開閭闔於彤扉拱雲霄於紫極瞻鳳蓋之晨飛見
鸞輿之曉出乃以千行鹵簿三署嚴更翔鵷列陞振鷺
充庭曳琴離之虹旄飄狎獵之霓旌繖如雲而五色扇
似月而重輪建九旒之仙仗會千官之火城丹墀兮絳
闕綺疏兮交錯瑞靄兮綢繡祥光兮景爍宮漏裊兮出
花遲爐烟縈兮垂柳弱煥奎壁兮旭日華奏簫韶兮鈞
天樂

皇帝乃御文華之殿陳九擯之儀發琳瑯之秘吐珠玉
之輝上公執簡名卿侍帷微言析奧深心剖疑搜義文
之精蘊窮性道之淵微既海深而嶽峻亦天高而聽卑
雖韜鐸之有採詎塵露之能裨冀芻蕘之可擇庶葑菲
之不遺乃傾葵心乃攄竹素仰企淵衷昭茲王度披玉
宇之祥風挹天章之調露矢一德以颺言戴

九重而抒懷抗古迹而為昭荷雲衢而生慕若乃琅函
玉軸錦帙芸編夜分循覽日昃流連掇仙葩之璀璨揆

睿藻之芳妍灑十行之珠翰染七襄之寶箋洽文德於
四國被風聲於八埏學既隆而加殖心善下而彌虔儲
精冲穆宅思優游考庸世室受策介丘定三統之建稽
五德之疇明堂辟雍之化洽升中巡狩之典修翺翔於
仁義之林藪沉酣於道德之源流含咀於藝文之英萃
斟酌於儒雅之諮諏扇芳烈以屆遠貺貞符而闡幽被
光華於四表輦厯服於千秋

末臣

簪筆乎盛世用敢作

頌以揚休頌曰於鑠我

皇德茂隆兮勵精夙夜昭有融兮作君作師亶明聰兮
允恭克讓心謙冲兮

講幄時開亮天工兮思以作睿懋

聖功兮化被六合流醇風兮

一人有慶萬方同兮

喜雨賦

有序

徐元正

歲當癸酉月在清和

皇上殷念麥秋爰祈甘雨

法宮盡齋祓之誠郊野獲土膏之潤豐隆列缺若奉令
而爭馳風伯雨師似徵符而即至是非精神之默
契呼吸之遙通孰能洽靈貺於滂沱兆豐年於穎
碩也哉用是盥手濡毫敬作賦曰

彼夫薄霧濛濛微風習習細非破塊亦潤物而無聲密

比散絲徒沾衣而不濕用欲逮乎滋培氣尚鬱於原隰
未若夫萋祁有象先徵礎潤之奇飛灑將來忽徙蟻封
之急雷霆激而常鳴蛟龍怒而不蟄陂渠水足徐抽麥
隴之針倉廩雲高預作蒸民之粒是皆歲星之在酉幸
逢

聖王之當陽並穗連莖極頌聲於鼓腹三年九蓄每厓
念於垂裳謂陌上廉纖但滋花柳天邊霖霖未溉農桑
甫下刑鵝之令立瞻石燕之翔豈管輅之占風智煩推

測若樂巴之嘒酒事屬荒唐惟誠格乎

天斯德孚於

帝重農寶穀遙通冥漠之間沛雨油雲立召嘉祥之瑞
垂簷百道似巖頭瀑布之形濺瓦千聲想水面跳珠之
勢拾遺遊處詩被涼催刺史來時亭因喜記從此與與
翼翼知黍稷之咸登蕤蕤陳陳獲坻京之大利方快覩
夫豐年共娛遊於盛世斯時也簾櫳濕透殿角涼生玉
女空中衣飄搖而欲舉阿香去後車歷碌而常驚撫檻

外之花枝新沾潤澤聽梁間之燕子亦賀生成世守硯
田時有含哺之樂頻遊書圃惟將負曝之誠

嘉禾賦 有序

王之樞

康熙三十有一年

皇上省方古北口外

鑾輿所道百穀蕃殖中有嘉禾叢生一莖數穗實穎實
栗聯疇被畝爰

命驛致闕下昭示羣工

臣

伏念書所記惟德動天苟非

聖德淵粹通於神明豈能使日星霜露之精暢被草木
以成奇瑞矧茲粒食蒸民所天非若萋蒲蓂莢朱

草華平徒稱瓌璋盖天所以慰

聖人之憂勤而垂恩儲祉也臣昧學少文詎克美

盛德之形容揚英聲以騰茂實徒以躬逢盛事願效衢
歌亦猶測量天地繪畫日月云爾謹拜手稽首而
為之賦曰

惟我

后之神靈實超邁於古先心亶仁以濺義躬闡坤而握
乾烈龐鴻以巍峻恩布濩而綿連膏潤滋乎后土協氣

奮於山川無一夫之失所暨萬物而皆然和三靈與百福暢九垓與八埏以

宵旰之靡寧思民隱之弗宣藉省方以為觀遂時行而應天當秋氣之清朗披金風之淅瀝韞碧草之萋萋閱丹楓之歷歷望關雲之曉舒聽流河之夜激澤馬鑣連山車轂擊旄建雄虹旂橫雌霓飛芝蓋於隰原轉風烏於亭壁道穰隴以停驂聞幽歌而控勒澗複林長阡紆陌逖騰疆刻鏤叔苴往縷績風布葉以離披露垂條而涓

滴則有嘉禾呈異侍從傳譁挺生上腴族類奇葩每一
莖而數穎蓋本合而岐斜根密蒙以攢立枝重疊而交
加沃夜瀝以凝實迎朝陽而吐華真太平之奇瑞鐫史
冊而爭誇爾乃

皇情歛抑

睿慮弘圖不矜千里之駿罔珍照乘之珠却貢則冰紈
火罽免輸則玳瑁珊瑚謂雙岐之特出視九穗以無殊
勿張皇而失實勿揚厲以加誣偶因從官之采擷

命載輕輶之逶迤集鵷班之濟濟開雉門之峨峨朱宮
翠靄紫禁香多離離綴蕾采采含科歡騰有位喜溢鳴
珂知符應之不虛信嘉祥之有以彼夫蒿宮譜經芝房
歌史孝竹之頌有聲瑞木之文如綺縱表異以示奇
浮夸而譎詭又若種異不周符稱北里九熟四熟之奇
元山玉山之旨雖信美而無徵何嘉名之足侈惟我

聖皇敬天之命合契剖符內霑外潤省夏甸以為度操
南風而解愠幾有開而必先德無倡而不應異穉為陶

虞之祥同穎乃成周之慶歷百世而同軌洵後先而比
聖伊微物之托生亦遭時而得舉日月播精雨露資茹
含英則噓噏山川練質則經過寒暑偶衆穉以叢生獨
亭亭而自處茲乃拔起田間輝煌天府近

帝都之光儀承

九重之笑語排金門而入玉堂雜珪璧而親袞黼典司
則什襲為珍拜舞則千官如組皆以

聖人有道念切無逸和氣凝祥惠風迪吉即讓美而弗

居終騰光於有飮載牒府以書年被宮商而應律昭靈
契於來茲貽休聲於罔極

宸翰賦有序

汪灝

歲在甲戌閏五月十八日

臣

於起居館隨諸詞臣

之後恭瞻

御書題嵩山嵩高峻極題禹廟功存河洛題淮瀆靈瀆

安瀾題孟子遊梁祠昌明仁義大字四紙煥若神

明莫可倫比

臣

維篆隸以後楷法斯興歷代帝王

翰墨所留載在諸帖者粲然可紀要皆行草數行
大不盈幅求其縱橫排宕流傳榜額者未之前聞

我

皇上天縱聰明萬幾之餘間臨楮墨金生玉潤體備法
完不第駕鍾軼王凌顏轢柳即從古英君工於臨
池者未有與頡頏者也至題額十六字格構森嚴
興象飄逸造化生心雲烟在手骨理天成毫無潤
飾

聖詣所及更創闢前代所未有照耀萬古而不磨者矣
臣
不揣蕪詞樂紀其盛爰拜手稽首而成賦

文開日月德被山川展瑤箋之璀璨觀

寶翰之盤旋龍奮鱗而騰趙鳳鼓翼而凌騫光搖銀海
喜動鵷班原夫鎮地配天維嶽之德疏河道洛維禹之
績奠四瀆以安流徵百神之受職惟仁義之道明斯楊
墨之風息允功業之皆崇宜表揚之孔亟爾其選言既
定繭紙待題染毫雖衆搦管難齊譬窠未審題署猶迷
或指巧而臂拙或寸合而尺睽氣臨池而索莫筆落紙
而灑澌紛塗鴉與墨承誰渴驥而怒猊於是臣工稽首

載求

明賜維

聖藻之昭垂既

天文之廣被照灤水而蛟騰輝尼山而鸞峙濂洛則雲

漢昭回闕閭則

宸章閎麗非揮灑於

一人何照耀乎百世於是萬幾之暇俯答羣僚拂玉几
鋪金綃探裘鐘選鹿毛滌鳳味之硯磨麟髓之膏舒硬

黃之古楮濡錯寶之秋毫乍兔起而鶻落旋烟靄而電
燦香繞金爐之外光騰珠斗之高其為狀也山嶽巍峩
風雲結聚圓轉銀鈎森標玉柱頓則山安導則泉注奮
則龍拏立則虎踞氣舉千鈞力穿七屬端如古聖兮劒
佩嚴逸若仙人兮丰神裕驟觀飛舞驚一氣之渾成徐
視停勻欽四時之分布匪惟超乎人工若有得乎神助
蓋緣悟通一畫理窮萬象善審低昂妙分背向或銳而
爭或隱而讓洞八體之精微創六點之逸宕小懷素之

如斗陋宜官之徑丈乃知得神契於毫端亦如運天下
於掌上若乃遙

頒汝洛分榜階廊斐疊曖曖熠燿輝煌峯巒星煥棟宇
翬揚壯淮瀆風雲之色生亞聖俎豆之香民所瞻兮歡
萬國神所依兮降百祥默扶世泰共翊時康豈止一十
六字之炳蔚留千百萬禩之喬皇

華山仙掌賦

劉 涵

維西岳之嶙峋鎮漢時而嵒嶭眺天半之高峯見雲間
之仙掌振險固於金方覆培樓於赤壤原夫巨靈初擘
仙跡微捫仿柱擎天輔鰲立坤依崇巖而設象據峭壁
而留痕排紅霞於夕照接紫氣於朝暄爾乃壯壓關門
高連天漢拓終南之蜿蜒障黃河之浩瀚渺千仞而巍
巍亘終古而旦旦翠入握而常凝嵐盈掬而不散若夫
山光靉靄烟雨繽紛發聲為霆鼓氣成雲草舞輕羅之

袖風吹彩纈之紋諒宇宙之在手隨轉運而綢緼亦或
靄散天青雲開日霽仰操持兮森嚴欲攀緣兮迢遞孤
標承露之形奮蓄拔山之勢五丁受其指揮百神歸其
節制蓋華峯者峙九霄之外據萬象之巔靈奇詭秘狀
貌精虔車箱入谷箭括通天徒仰岩堯之色誰尋玉井
之蓮是以天示仙踪山成懸度常抒捧日之心直指登
天之路扶兩儀而顛顛搏九州而鎔鑄豈止握關輔之
形勝壯秦封之鞏固方今寰區混一海甸昇平山川奠

定表瑞呈禎屹崔巍而相向拱翼戴於

神京况茲掌之神奇尤下土所瞻視靈居五嶽之先秩
比三公之位備指臂於

天家效膺力於巽地行將引懷柔之神祇導

宸游之天駟

喜雨賦

有序

魯瑗

月維首夏序屬恢台麥浪翻風已改青童之節桑
田零雨宜行赤帝之符偶杲杲之經旬致祁祁之
失候颺晴絲於綺陌雲轂常遲懸朗鏡於瑤天雷
門未啟雖不比暎暘之歲亦恐妨稼穡之功爰厪
念於

九重特戒期於三日陳牲贊幣雩壇之禮未行倒井翻
河郊圻之澤已遍歡騰綠野喜溢黃輿仰

聖德之潛孚頌甘霖之立沛

臣

職居東觀望切西成早

簪筆而記年豐特拜手而占

國瑞賦曰

維和氣之上應識景運之遐昌考鴻猷於姚姒溯盛業
於軒黃稱明良之有慶頌覆載之無疆均調兮六氣焜
耀兮三光伊歲時之豫順亦民物之豐穰歲當作噩月
維仲呂太皞解符長羸司序桐井兮微薰槐庭兮初暑
維茲燕薊之都偶浹旬之未雨日皦皦兮青郊霞飛飛

兮紫籞宵瞻玉兔兮徘徊曉望彩虹兮延佇雖未妨於
農疇已軫情於

當宁於是

敕僚采

諭職司掃社稷治壇壝禮官擇吉祝史諏儀樂正修鞞
鞞之器舞童習雲漢之詩將致齋於三日竭禱祀於靈
祇乃

宸念之精誠早合符於冥漠壇中之圭幣未陳天上之

油雲已作石燕應候而將飛土龍乘時而欲躍聽鳴鼓
於天門觸揚颺於林壑挽碧漢以如傾挹天漿而共酌
挂長足兮郊原織斜文兮帷幙初灑屋而絲飛旋垂簷
而溜落即畿輔之滂沱諒八方之優渥若夫澗湧新流
山攢積翠九陌潤兮烟凝六街濕兮霧漬居人無沉竈
之虞行客有墊巾之致滋草色兮澄鮮霑花光兮嫵媚
魚迎浪兮揚鱗鳥投林兮垂翅灑變化兮墨池播珠玉
兮荷芰儼雪浪之翻天忽銀河之瀉地於時良苗誕種

秀麥將登披神漿之霖霖散驕陽之鬱蒸既葉潤而枝
濯遂澮溢而川增洵

天心之仁愛實盛世之休徵吾

皇德被方區慮周疆里對此甘霖

天顏有喜膏露降兮同傳慶雲見兮並紀惟

聖人念切於民依斯

上帝恒錫之嘉祉歡騰庶采慶溢羣生陳風詩於

殿陛聆謠頌於寰瀛欣彼蒼之沛澤卜品物之咸亨昀

昀原隰穰穰春耕五風十雨共樂昇平

微臣

忝東觀之

列謹載筆而慶西成

瑞禾賦

湯右曾

維

聖主之膺圖體乾坤而合撰調六氣於虬床叶三辰於
芝簡開九戶而揖禎符環四瀛而絕垠限榮光燭兮駟
津瑞靄凝兮豹產高廩無際明星有皖洛水滌紆嵩山
嶮嶮地居陰陽之會課入田歌天開宇宙之和移來穀
板普靈貺之為昭樂駢枝其並綰彼夫連騰被陌修畛
曲隅一日二日而黛耜舉四月五月而紫芒敷蔥翠弱

葉疎遒圓株亭亭而抽芳實蓊蓊而牽蔓于花吐月魄
房含露珠隴分上下土別墳壚黍稷其馨既稂莠之不
害稼穡惟寶條忭舞之載途謂歲功之有序迺天休之
默符秀擢三楹滋銜一本噓喻索籥網緼根苑影參差
而日華態纖靡而風偃方於同心之義韻合離離比諸
連理之祥枝排蓊蓊終呈奇於穠樛始挺質於麓藂仙
人珠樹豈並施於絲蘿海上蓬山或同根於芝菌慶儷
三秀榮開九畹望北里兮玉禾植西山兮瓊巘於是田

暖色喜甸人致辭當白藏之履節值青要之屆期萬寶
告成功還貞於品物百穀皆熟靈乃効於神祇喜氣臨
而平疇動色祥煙拂而厥土惟宜淑氣肇於互根本由
無而得有嘉名擬諸並蒂還自偶而之奇沐雨膏兮殊
形合體挺沃衍兮默宰潛移豈不以生為上瑞出應昌
時惟

一人之穆穆繫百僚之師師爾廼賽彼田祖卜茲吉日
同漆臬於貢包進琅玕於天室靈種析而分條神用符

而聳質照九阿兮繞霏霏齊萬頃兮搖瑟瑟良仁感於
彼蒼故精通於我穡覆鱗隰兮欹垂動星田兮牙出甌
函獻而畫史繙圖雅頌成而詞人擁筆占歲取之畝千
信交孚之德一考自上古廼見旅生香分瓊粒色耀華
莖朱草繁而景風應靈芽發而泰階平多稔斯詠雙米
載賡九穗升而雀銜炎帝三苗獲而雉獻周成玄秬黃
蓂漢臣頌其靈寵銀緇金縷唐世賦其休禎孕神膏於
木王溢盛氣於刀耕將輝前而映後洵齊芬而共榮於

焉銅鋪肅衛銀榜端簪九賓之儀備萬國之

恩覃頌

帝力兮侯甸采衛解民愠兮東西朔南衍乾元而用九
會

皇極以居三賜復蠲租子惠之澤溥履慈止孝中和之
德涵兆乃形於終畝功偶効於作甘仙渰華而嘉彙殖
卿雲護而休氣含識動植之情協悟神入之道參豈止
茅稱三脊麥傳兩穗謂乾慶之有歸乃神符之所萃獲

之稭稭有飴俎豆之香烝之浮浮用光瑚璉之器肅几
筵之將享潔粢盛以昭事美時和而年豐維天工其人
治五雲抽潤而紫鵷調六琯同和而朱鳳至殊徽狎臻
祥圖莫記斯則忻九熟而謠歌綿萬年而昌熾者也

瀛洲亭補種新槐賦

湯右曾

清切曹司澄鮮省署繡拱霞皴黃簾月瀝卓亭子於中
心是玉堂之佳處森羅桃李凌百卉以非宜雜置蘅蕪
計十年而何與爰封殖夫新槐作蓬瀛之嘉樹彼夫高
柯矗縮密葉龍蔥鐵石堅骨冰霜鍊容皮鱗質黝條猋
陰濃道周夾柳殿角環楓比榆檀而挺節偶松栢以摩
穹礪砢十圍崖蟠谷跨陰深百尺霧鎖飈衝此則梁棟
待構山川借雄者也稟粹星虛吐芽春尾當百五日節

的的兔睛經二十番風茸茸鼠耳兼兩句而成葉閱三
時而結子黃中黛表品流非金縷之儔畫聶宵炕種性
豈青裳所擬葩紛南陸離明之晴朗相輝翠西東都溽
暑之熇蒸盡洗華滋湛實功先冰澗之雪腴寶液凝丹
味壓雲房之石髓則有漢宮香馥秦里陰連承華門外
御史臺前江東則千株攢秀洛陽則一樹單妍殷仲文
典午風流低徊寄慨庾肩吾蕭梁才子服食幾仙垂管
氏之遺制錄莊生之內篇憶曩歲之觀光入橋門而負

笈三十區之學舍樹樹烟含十二街之

帝城行行雨濕靜坊鍵戶屋頭之影晨遮精舍鈎簾簷
額之陰午入睠老根之盤鬱勵志幽貞睇修幹之崢嶸
矯心植立冷淘逸味每延客以同清鑽火芳辰或望古
而遙集屆溫飈之扇序花破萼以舒黃糝離離之金粉
飄漠漠之暗香帶夕陽之一塢點亂書之半牀麗景絢
空郁烈因之助暖生衣被體芬菲轉為招涼正縈懷於
夏課每緣花而益忙荷遭逢於

紫禁尚追摹而不忘升儼雅之石渠界逶迤之金水煥
丹碧之櫟題枕縹緗之圖史覩扶疎之綠槐列朱廊而
若市又益之以新栽更廻環而徙倚嫩於初柳猗若女
桑俊穎才擢柔莖未蒼參差八九樹疎密兩三行湛露
方承適俗之姿已遠祥飈漸拂參霄之勢難量碧檻青
疏擅風情於藕渚蘭塘之上宮壺法酒迎懽讌於柯亭
劉井之旁三島烟霞涼宵掩映十洲鸞鳳清晝廻翔天
上白榆相將碧落苑中廬橘各自紅牆滋息因材栽培

得地芳馨種類只傍瑤墀華貴丰標定依文陞院廳秘
邃看風舞以自如瑣闥崇閎觀雲屯之方始向堂階而
種植有人占奕世之祥奏笙磬之聲音正面辨三公之
位

梧桐賦

劉灝

伊梧桐之靈材蔚疎林以擢秀幹鬱律而孤生枝婀娜而遠覆發風韻於幽堦動雲光於晴晝當朱夏而陰濃拂丹霄而勢茂爾其秉姿高潔結體貞堅不繩而直匪規而圓中以虛而能響外雖朴而彌妍映蒼松與修竹絕蘿附與藤緣蓋其族出於嶧山根生於南岳朝陽之所煦臨沃土之所旁薄依峻岸而生滋據蒼岑而棲托故能表異於龍門蓄榮於鳳閣至於華揚春季葉落秋

初素芬徐吐繁影微疎按消長於時節驚徃復於居諸
亦或剪偶成珪績能為布昔開唐叔之封曾入牂牁之
賦馮翊獻以九枚華林裁以三樹至若選材作瑟截尾
名琴含山水之趣叶宮徵之音托朱絃以送目揚白雪
而平心則有角里幽人衡門高士屋北窗前臺邊欄裏
傍玉井而成帷蓋銀床而如綺晨露滴而尤涼夜雨洗
而增美爰朝玩而夕吟每情恬而意喜乃其修柯峭蒨
古質輪菌淨如綠玉老似蒼鱗足令夫塵氛歛息鳥雀

逡巡若夫移根

上苑之旁布影

彤庭之側峙拳拳之偉標垂離離之嘉實應虞舜之雅
歌集祥鸞之彩翼斯其効黼黻於

清時豈肯等歲莖於凡植

瓊島春雲賦

黃叔琳

試仰望兮春雲溶溶搖曳乎瓊島之中逐烟巒而不定
駕晴嶺以浮空連殘雪兮近北借微風兮從東維時柳
颺輕絲草縈長帶識島嶼之春生見雲容之堪繪雜五
色兮含烟入三山兮張蓋氤氲宮殿之旁縹緲蓬萊之
外島假勢於斷雲雲橫陣於層巔垂鵬翮以近海象魚
鱗而在天自無心而能化洵有態以增妍植十洲與三
島曾不離海上之神仙爾其來也不疾不徐其少進也

若密若疎減奇峯之兀突類餘霞之卷舒或灼灼兮曜
流或皜皜兮素積覆春樹兮縈青映春水兮凝碧樹搖
影於上林水涵光於太液與斯雲乎往還共朝昏兮晨
夕既而叢彩不散奇狀難名髣髴瓊樓之重疊依稀金
闕之充盈非綺羅之繡出即丹青之染成帶晴烟兮疑
重披薄霧兮猶輕陟帝鄉兮不遠起封中兮預結光隱
隱而彌沉影緜緜而不絕有山光之掩映無蜃氣之出
沒故能觸石於膚寸不崇朝遍九州而自合而未知靄

靄之春雲時往來於閭闔

刻漏賦

揆叙

原夫天地之形雖昭融而易見陰陽之理實悠遠而難明時忽忽其代序歲冉冉而遞更苟無七政之考辨安知二曜之期程爰稽考於往古固茫昧而無憑自軒轅之初造創神器於邈冥迨成周而始備窮制作而研精分挈壺以命氏勞推測而經營倚玉衡以定制鑄銅壺而聽聲運奇功於水火審晷度之虛盈規模雖著於周禮制度則盛於張衡精思變幻握算奇零既有分乎昏

旦夫何礙乎陰晴雖儀形已因其草就而精巧未臻於大成若其律呂偶殊錙銖或異儻不辨於高卑便貽差於躔次徒悵恨於曩時幸遭逢於

盛世薰琴應候何殊虞帝之隆瑞莢生階遠軼陶唐之治見玉燭之均調仰黃雲之畢萃乃咨保章之官命靈臺之司考異同於寶曆成斯噐之恢奇金徒抱箭銅史候時量方圓以立體因吐納而成規視三光之出沒察四氣之推移算奇贏而無乖累忝辨晷刻而不失毫釐

果出神而入化本杳冥而難窺爾其回波激射顧影參
差陰蟲夭矯而直上靈虬蜿蜒而倒垂信律呂之不爽
如圭撮之無疑不出軒楹而涼暄易曉恒居室宇而晨
昏可知何前賢之所不得及而後世之所莫能為者與
若夫推測之精詳位置之整密流傳久絕於東方神妙
迥超於西極雖丁緩莫得逞其材班輸無所試其力誠
天上之靈機可通而人間之能事已畢矣至於獻賦甘
泉校書東壁滄海非螭酌可窮碧落豈管窺可識銘殊

孫綽悲玉馬之無功賦愧陸機笑金舟之何益徒伸紙
以濡毫實汗顏而赧色况復五行適時八歲順德鳳凰
翔於軒閣之旁麒麟遊於文園之側願比義於華封頌
洪庥於萬億

塞上觀獲賦

揆叙

維

聖主之勤民法行健而巡幸運萬象於辰樞駐六龍於
邊境擴八荒在闡之模昭四海為家之盛關嚴虎豹迎
黃屋而區脫春迴塞接螭螭臨丹蹕而兜鈴撤警時則
金逢庚伏鶴露未零火向西流鷹風先冷白藏應候迺
朔吹乎三陴黃茂連雲兆樂歲乎萬井爰符夏諺之一
游遂乘秋斂而再省徒觀夫松漠之野榆塞之旁咸載

芟而載柞成我理而我疆性則兼乎墳壚埴壤種乃糞
以狐鹿牛羊方其春耕正及土膏之滲漉及其夏耨益
以甘澍之汪洋乃有唐稷所播農帝所嘗赤糜白芑黑
秬黃粱天竺四熟之米日南再種之糧融臯則一旬自
植長沙則五里聞香莫不接畛畦而擢穎被疆場以垂
芒衍農政於箕疇一曰食兮二曰貨奏田功於豳雅千
斯倉兮萬斯箱我稼既同田畯至喜侯主侯伯侯彊侯
以爭樂事而赴功猶波注而雲委游惰罔見於閭閻拮

据不遺於婦子携來錢鏹耦駿發以十千盛用籌車數
且溢夫倍蓰豐登幸際乎金穰勸相况勞乎

玉趾水耕火耨得邀萬室之盈焉出作入息咸荷

一人之賜矣

皇上乃弭雲罕曳紅旃歷南陌履東阡喜邊氓之勤穡
導

聖化以力田能使改沙漠之區並成樂土抑且編衆宇
之廣共慶豐年黍稷稻粱處處沐和風甘雨東西南朔

人人戴舜日堯天擊壤衢謠競進

天子萬年之祝歌功頌德永傳豳風七月之篇

賜觀瀚海石賦

錢名世

上林荷橐清暑磨丹

宣玉音而共諭頒文石以同觀囊甫開於錦匣光先射
於玉盤細纔雀卵輕侔彈丸百枚珠琲一寸琅玕含雲
氣而欲吐裛露華而未乾珊瑚凝采水晶透寒瑩如朗
月初照簇若繁星互攢分南宮袖裏之數片點北苑毫
端之萬巒

帝傳命曰此瀚海之石採諸紫塞而携自雕鞍者也爾

諸臣侍彤墀趨鈞砌其可勿操觚染翰乎哉臣名世拜
手稽首伏而言曰事有小而徵大物有微而闢鉅慶茲
石之呈華頌我

皇之文武蓋統百萬之貔貅涉龍沙而入阻此軒轅氏
之武定羣方而以師兵為居處也抑睹奇彩於幽遐停
鑾輅而攬取此有虞氏之文光八表而以衣裳施藻黼
也至於旁收廣厲之盛意更有迥超乎千古者焉想夫
黃鉞親征三犁朔庭萬隊浴鐵九霄震霆鴛鴦之樂飲

馬雞鹿之塞揚兵臨絕漠而徑度騁荒沙而不停運神
謨以殄封豕展廟畧而斲長鯨乃小石之微瑣忽仰動
乎

聖情按寶鞭而笑指遣虎旅而爭錄散漫兮無涯披尋
兮滿谷犂确兮半襟塊壘兮盈掬淘沙內而得金披巖
璞而知玉夜光剖於蚌胎鍾乳流於石腹詎若茲掇拾
之不勞而取携之至速雨雪侵而質性彌堅塵埃撲而
光芒轉蓄凌追風躡電之馬蹄帶繡溢斑斕之箭鏃緬

太湖與仇池諒峯則其同族繁閬州之錦石庶比形而
齊躅磊落晶熒輪囷歷碌前驅挾而神丘勒銘歸騎挈
而鏡歌奏曲

聖天子武功大定文德誕敷唱舜歌而垂謨典彰義畫
以闡苞符萬幾暇則羣經搜討寸晷閒則六藝游娛爐
清麝氣簾捲蝦鬚環寶畫羅乎冊府纖塵不到乎蓬壺
琉璃硯匣之旁翡翠筆牀之側置此石以相輝絢陸離
之五色或通體瓊明或半邊瑤碧或散點嵐黛或斜霏

雲白或過雨天青或臨池水黑雕一物於沉檀耿七星
於北極盤螭天矯旋螺明哲秋葉烟含春花露滴雲龍
交映而彩飛人物在中而影隔莓苔駁小築之山琬琰
賁容刀之飾芝英吐以煌煌榴實垂而的的摘丹荔於
閩天擷紅豆於南國他如韎韐頗梨瑪瑙琥珀五雲之
潤咸滋七寶之光遍射莫不極嫵盡妍涵津漬液畫史
無從繪摹巧匠不能刻畫蓋由我

皇上有才輒擢無奇不搜礪砢每邀夫鑒賞堅頑勿吝

夫雕鏤勵臣節必共盟鐵石效衆長則不棄遐陬稟貞
心與勁骨既克副乎敷求況含英而吐曜更

恩寵之最優縱巖棲而穴處定賞雋而拔尤懷璧者無
韜光之慮獻珍者無刖足之羞昔則泥沙委置今則崑
閬優游飾萬釘之寶帶濯三島之清流懼砒砒之陋質
難混迹乎琳球矢愚忱之匪石長共奉乎瀛洲

御賜砥石硯賦

查慎行

維

聖主之右文當中天之盛際

朝有善而畢登野無賢之或棄於是地不愛寶物胥呈
瑞凡抱質與懷材咸手額而踵跂思樂育於昌時冀效
能於

聖世竊聞

盛京奧壤峯迴海環蘊扶輿之清淑標峻極之瑋觀孕

秀於松花之江鍾靈於砥石之山爰有佳石出乎其間
其為質也溫兮如玉滋液清泉含姿邃谷表堅貞而外
彰歛精華而內蓄其為色也雲蒸霞郁分吉光於翡翠
燦目彩於鸚鵡貯秋水而痕清浮春巒而眉綠維時

萬乘東巡周覽神臯采彼美產用礪容刀發芙蓉之顰
瑩鵬鵜之膏覘良材於歷試遂寵被以榮褒迺召良工
斲以為硯雅製斯成文茵斯薦既特達而受知爰輝煌
於臺殿洵大智之創物同擢微而舉賤爾其同材異狀

羅列琳瑯刻以雲雷之紋映以奎壁之光或圓規而方
矩或全珪而半璋滑不拒夫隄靡膩不留夫毫芒固已
剔厥瑕璽而萃其精良

聖天子方壽考作人澄懷有主賜以銘詞載諸冊府惟
以靜而永年標大義而綱舉配二典與三謨垂日星於
萬古首頒元輔

聖訓是欽再及宮僚麗澤彌深以至供奉文昌之署圖
書翰墨之林如雨露之霑獲儼象緯之照臨於是乎拜

自瑤階捧出琳宮丹霄之梯千尺紅雲之殿九重下以
誇示於子孫上以炳耀乎祖宗孰不感有生之榮幸慶
茲石之遭逢蓋自書契以來下逮宋元之季硯之為品
譜不勝紀鳳咮以山擅奇龍尾以溪表異紅絲與眉子
殊稱紫玉與青花並儷彼後來而居上推端州為最貴
然皆產自遐陬出於荒滙詎若發跡之奇近在

興王之地甫離巖穴便親廊陛磨礱告竣於文房銘贊
式承乎

御製一人崇儒而徧賚百爾山呼而拜

賜夫豈尋常之匠石所可婉其位置者哉臣材同礫棄

質愧瓦全膺千載之殊遇實僅覩於簡編抃舞於諸臣
之後拜

恩於黼座之前竭微忱於颺頌非筆墨之能宣惟仁者
之必壽象有取乎樂山託盤石之鞏固祝

天子之萬年

聖駕三巡塞北蕩平賦

有序

吳襄

皇上御極以來八垓春麗六幕風清

聖帝有真玉鏡曜垂裳之宇

王師無敵銀河揚洗甲之波三蘂冰消九邊烽熄杜鵑
啼去鳥道烟空精衛填來蜃宮浪靜金甌永奠玉
斗長暉既衆往以成王自止戈而為武前者噶爾
丹狼心莫洗螳臂空張騷萬里之歸藩勞六師之

駐蹕

仁人不殺無非拯此一方大造好生未必寬其三面頻
臨紫塞永淨黃沙日斧斯揮星旄頓落絳旂一片
俘來擣穴之兒銅組千蟠擊得專車之骨功成漠
北慶溢天南露布遙飛鐃歌競奏謹拜手稽首而
為之賦其詞曰

將欲規天蓋以為畿矩地輿以作宅代日月以曜靈助
雷霆以殄逆車書通崑汜之垠玉帛遍緹紘之陌畫成
禹甸無彈丸偶漏之星補盡堯天鮮粒黍不周之石則

必瑞應河清膏同海溥致治而囿蓄祥麟戡亂而庭驅
虓虎同歸玉版難容小醜之跳梁一奮金戈遂衛羣生
而安堵臣嘗稽麟牒攷龍圖三錫蓄衆七政行誅版泉
鬥蟻涿鹿鳴孤青丘擐甲白浦援枹東越則防風就戮
南郊則有扈旋俘維彼五帝三王之馳驟亦藉四征九
伐而驅除赫矣

熙朝烝哉清宴紫達叢花華平發箭玉馬集而銷兵騶
牙來而息戰

天子方揮綠綺於蘭宮披丹書於楓殿臨百子以和汾
歌啟九成而開鎬燕而乃蠟丸告警羽檄交馳塵迷北
戒烟起西陲幾陣銅焦吹來紫塞一軍感策響近龜茲
白馬如風類成蛾賊青袍似草恰肖鴉兒蠢爾相殘鵲
蚌交持而起釁狡哉犯順鵲鳩互逐以支辭乃猶三軍
未誓一紙先遺示

皇疆以有截申

天語而無私豈有潢池一任么麼之好弄非無斧鑕姑

憐小子之無知詎意鷹飽思颺猿亡拒捕邊霧仍屯戍
雲復布兇罪既盈

天威斯怒義激蘭錡聲騰甲庫徵嫖姚檄都護告

九廟以興師駕

六飛而遠駐臣未遑述孔武之軍容也而先對揚如神
之

睿慮念茲寇也鼠首藏奸鴟張肆虐擔魯橫蹂固麻縱
掠稍容烏合必致連雞不奮鷹揚終成犄角絕肩臂而

援孤扼咽喉而魄落黃沙白草無堅守之嚴疆駢酪獮
醢有難填之饑壑奇奇正正腹受敵而背已攻實實虛
虛進撓危而退復卻衆纔萬甲縱銅脰鐵額其奚強士
有億心雖虎箭繚弓而亦弱網無三窟任脫兔之斯奔
釜豈西江笑游魚之自若乃若天邊破斧地角飛輪傳
餐雷動列甑星屯寧塞外之黃茅偏生聖米何關中之
白粲立轉勞薪威斗鏗鏘萬竈之燒雲不夜留犁韁鞞
千軍之浴鐵如春至若駒騰赤水驥產烏孫金羈久控

玉勒遙奔蘭筋則朝疲沙磧血汗則夜滴荒原歷百戰
而追風預憇桃花之足衝千羣而掣電時豐苜蓿之殮
而且玉壘棋羅鐵騎雲織站設燉煌泉飛疏勒縱雉尾
而火蛾翔張蜃弧而饑鴟集捲地蛇蟠之陣日照旗紅
橫空雁子之都風號箭黑狼居胥峯堪刺日積甲還低
火敦腦浪欲黏天投鞭可塞凡茲金城百勝之威莫非
玉趾三巡之力當

聖駕之初巡也旆揚牧野瓦震昆陽開巖關以禦寇涉

天塹以平羗裂前鋒若敝竹堵歸路如銅牆韎鞞翻紅
萬頃之龍沙似血刀鋒畢白六月之塞草猶霜然而師
出窮邊軍方一捷賀蘭剩壘尚卷零旌嘉峪殘營仍藏
敗甲搜牢緩則豕突難防撲剿神則狼奔自蹶此則以
天低玉帳重臨馬邑之城月滿雕弧再射龍堆之堞也
爾其衝冰夜渡裹鐵晨征寒花淬劍瑞葉縈旌雪密如
綿壓紫貂而作鎧雲濃似墨團繡縵以成城萬騎刀橫
怒電擊蠃螭之塞三更弩吼驚風亂鵝鴨之聲於時禿

髮茅靡朱眉粒絕欲掠飛芻徒蹈覆轍望雨粟而呼天
嗟倒戈而噬雪彼幕南之屬國莫不勤王豈朔漠之餘
逋尚容苞蘖縱復表乞全軀詞哀飲血亦安能少緩壓
境之師而免繫降車之綫也哉爰屆初春急趨寧夏虎
賁外環龍驤中駕鐵山則八校星馳玉泉則九旂電射
漢雲五色爭籠帳殿之高秦月重輪恰補邊牆之罅因
而崇臺閣將絕堡籌邊剖銀菟於後勁標銅虎於中堅
扛鼎雄夫張八旗以斫陣翹關健旅撾六鼓以分甄傳

介子氣吞樓蘭奮夏箭唐弓於塞月衛仲卿誓掃冒頓
壯鄂刀褒羽於蠻烟維彼封豨窮同鼯鼠獍歎亡羣梟
悲失侶勢隨風摵以相摧罪擬丘山而莫舉天誅賊子
以報思明人憤兇渠先擒慶緒誰云肝腦難汙輦下之
灰釘料彼頭顱自列軍中之鼎俎知銜壁以無生嗟離
孥而莫拒狐思正首漏鸞刀百磔之刑鳩自屠腸應清
酒一壺之詛從此霾天乍霽瘴雨全飛牽縶致貢捧雉
爭歸絳帕當胸山呼動地頰羅蔽膝虎拜成圍奏普梨

而黃鍾答響舞回紆而白鵲同揮風馬雲車夾

鸞旂而迴

玉闕銅標鐵峽鏤鳥篆以銘金微紫紺分來酬躍馬平
淮之績銀章鑄就壯從龍分陝之輝布木鳳以沛甘霖
恢八荒之法網息金笳而舒化日覆九有以戎衣計自
陳師以迄飲至捷告惟三時周末四鄙五十二戰之偏
勞哂二十七征之失利無煩鐵筋以前籌免約白衣而
並轡闐顏縱捷豈盡空玉塞之廬高麗雖征寧立拔銀

城之幟積百王之舊憤至此方平建千古之庸功應推
無二維豫鳴夫大武正咸臨夫太和鰲撐地軸龍繞天
戈垂

綸音而開朱鳥御

黼座以獻金鵝四阿則星斗聯珠象

天朝之畛界八閩則雲霞散綺繪絕域之山河武偃文
修乘白驃而發太平之笑風和日麗彈紫電而吟大捷
之歌歌曰景星爛兮紫宇消天風鼓兮參旗搖

翠華北指兮南有杓展

神謨兮廓四郊膏流中外兮無淳澆又曰

六龍駕兮環九鴻氛祲淨兮戢武功雲和鳴兮開羣龍
帝基鞏兮垂無窮

聖萬禩兮天之中

皇清文頴卷四十六



總校官庶吉士 臣張能照

校對官檢討 臣王鍾健

謄錄貢生 臣蘇曰柄